

A.K. 408, 15.

X 187 9552

Hm
252

HENRICI MEIBOMII
DE
ILLVSTRIS
HEIMBVRGICÆ
GENTIS
ORIGINE ET PROGRESSV
Epistola
ad


*PERILLUSTREM ET EXCELLENTISSIMUM
DOMINUM*

DN. FRIDERICVM
ab HEIMBVRG
SEREN. BRVNSV. ET LYNEB. DVCIS
SVPREMVM STATVS CONSILIARIVM
ET CVRIARVM PRÆSIDEM
DOMINVM IN GOLTERN.

••(o)••

HELMESTADI,

Typis GEORG-WOLFGANGI HAMMI Acad. Typogr.
Anno M DC LXXXIII.







PERILLISTRIS DOMINE

Henrici IV. Imperatoris Historia tota,
& eventuum varietate, & miris rerum cir-
cumvolutionibus, hinc Cæsar's infantia &
mala educatione, educatorumque vafris ar-
tibus, inde Principum conurbationibus, & Pontificis Ro-
mani impotente ambitione, omnia sursum deorsumque
volventibus, tam est memorabilis, ut proponi in exem-
plum, & à rerum civilium studiosis accurate expendi me-
reatur. Bellum tamen, quod Imperator ille cum Saxonie
Principibus, libertatis suæ tenacissimis, diu gessit, pecu-
liaribus etiam de causis, iis, qui in Saxonia vivunt, diligen-
tius considerandum est, cum non tantum inde, quis Rei-
publicæ status, quæ Cæsar's auctoritas, quæ Principum
conditio fuerit, pateat, sed plurima quoque passim oc-
currant horum locorum memorabilia, bello quippe in hac

A 2

vicinia

vicina nostra gesto, ibique Arcibus illis & Castellis extructis,
quæ vel æternum jugum Saxonibus imponerent, vel di-
ruta & disjecta, in ipsis ruderibus suis vindicias libertati
datas seræ posteritati ostenderent.

Cum igitur nuper in Historia Germanicorum Cæsa-
rum publicè enarranda ad Henrici IV. tempora me detu-
lisset ordo, pleniori discursu bellum illud Saxonum illu-
stravi, jucundaque contemplatione in viciniæ nostræ an-
tiquitates digressus, simul exposui, quomodo Imperato-
res Goslariæ sedem suam habere, & inde libertati Saxo-
num imminere cæperint, extructis per totum illum Hartzi-
corum montium tractum pluribus validissimis Castellis,
quorum vel sola hodie nomina, vel tristia & squallida ru-
dera supersunt. Hic tum memorandæ mihi fuerunt Ar-
ces & Castella varia, *Hartzburgum* imprimis, *Wiganten-stein*, *Sassenstein*, *Asenberg*, & *Heimenburg* quoque. Mo-
nui igitur, ab illo castello *Heimenburg* Illustrem Gentem
Vestram, ab Henrici IV. ævo Saxoniam jam cognitam, sui
nominis originem arcessere, ibi Majores sedem suam ha-
buisse, & in omni hac vicinia Cæsarum Principumque be-
neficio multas terras & prædia sibi acquisivisse, donec tan-
dem alibi domicilium figerent. Illa vero occasione, pri-
vatis deinde studiis ea evolvi & recolui, quæ de Gente Ve-
stra cum mihi ex antiquis monumentis alias excerpta &
seposita, tum ab avo meo, Henrico Meibomio, Historico
Guelphico, ante plures annos consignata, *Dn. Aschwinus*
ab Heimburg missa fuerunt, ceu ille in Chronicu suo Mari-
enthalensi testatur. Non enim nuper demum in clientela
Heimburgiorum esse cæperunt Meibomii, sed integrum pe-
ne Seculum est, ex quo in Gente Vestra rectorum studio-
rum maximi Patroni extiterunt, & nobis quoque eximiè
faverunt. *Aschwinus ab Heimburg* (sive *Ascanium Ro-*
mana voce dicere velis) quem, familiariter sibi notum,

Johan-



Johannes Cafelius noster, litteris incertum an probitate
magis æstimandus, gravem virum, prudentem & integrum,
ingenuarum omnium disciplinarum amantem, sed potissimum
historiæ, universæ quidem, patriæ tamen cum primis, appel-
lat, eundem Avus meus dignitate, genere, & doctrina nobilis-
simum vocat, sibiq[ue] ac studiis suis (Historicis) ex animo fa-
visse scribit, in libello de Irminsula Saxonica, notatque, quod
cum summi templi apud Hildesienses esset Canonicus, ibi
inter Patriarum Antiquitatum sollicitam curam primi
Saxonum Idoli Irminſulæ effigiem, ignoratam aliquot se-
culis, situque & rubigine squalentem, interpolari innova-
riique curaverit. Idem Avus meus meminit ibi Cognati
Vestri Theodorici ab Heimburg, Canonici Cathedralis Ec-
clesiæ Mindensis & Archidiaconi Remensis, & similiter vo-
cat genere & virtute nobilissimum virum. Sed ad Aschwi-
num redeo, Patrum Tuum magnum, Perillustris Domi-
ne. Ille Patriarum licet Antiquitatum curiosissimus
non minus ruspator, quam peritissimus Judex, fami-
liarumque etiam nobilium indagator, & propriæ non
incuriosus, fatetur tamen in Epistola, anno seculi hu-
jus secundo data, se de primis Familiæ suæ conditori-
bus non nisi patrias quasdam traditiones habere. Quæ
igitur Avus meus ex antiquis tabulis, diplomatis & litteris
eruta cum Illo communicavit, gratissima habuit, & plu-
scula sibi cognita dein adjecit, ut integrum celeberrimæ
gentis seriem posteri haberent. Quæ vero ego postea
observavi non pauca ex similibus monumentis, ea cum
modo dictis collata, & in ordinem digesta, & commentario
quasi quodam Historico illustrata publici juris nunc facio,
cum, ut exteris quoque pateat, in Saxonia nostra Nobilis-
simas Familias à pluribus seculis incorruptum decus ha-
buisse, & ad posteros transmisisse: tum, ut meam erga
Illustrēm Domum Heimburgicam, & Te imprimis, Excel-
lentis-

lentissime Domine, observantiam declararem. Hoc enim
in singulari felicitatis meæ parte deputo, quod , simulac
ego in hæc loca, Patrias Avitasque sedes, quasi postlimi-
nio nepos redii , & fortunam aliquam sperare cœpi, à Te
statim , quem maximus virtutum & ingeniorum censor,
Serenissimus Dux AUGUSTUS, inter præcipua Princi-
patus sui instrumenta ac decora tum asciverat, studiis meis
polliceri patrocinium potuerim. At ex eo tempore, vi-
ginti amplius annos, uti forutnam indies majorem non
tam invenisti, quam meritis Tuis Tibi fecisti, ita crevit
erga optima studia , erga hanc inclytam Academiam ,
erga me quoque favor, ut quo plus posses , plus etiam
velles. Dicendum est Academiæ Juliæ nomine, quoniam
ejus quoque pars aliqua sum , tantum illam debere Tibi,
quantum cuiquam primariorum Ministrorum , amatam
semper à Te, tanquam nutricem etiam quondam , sub-
levatam in necessitatibus suis, & nunquam non commen-
datam Serenissimis Dominis nostris. Est interdum ea
publici fati conditio, ut studiorum debita non habeatur
ratio, oborto erga ea quodam quasi frigore: sœpe etiam
non desunt , qui contemnant ea , & in exilium agere cupi-
ant,& quovis modo cum suis cultoribus deprimant: ut tan-
to magis gratulari possimus nobis , quoties à lateribus
Principum sedent, qui studiis , ut coluerunt ipsi, ita ju-
stum premium ponunt, &, ne tam utilissima parte Res-
publica deficiat, prudentia sua cavent, cultorumque com-
modis prospiciunt. Qualem quidem Te semper, Peril-
lustris Domine, plurimis , certisque tot annorum docu-
mentis novimus, & experti sumus , quotiescunque res
Academiæ ordinandæ, ejusque vel salus in universum
promovenda, vel docentium desideriis prospiciendum
fuit; recentissimâ adhuc eorum, quæ ante biennium in
salutem nostram acta sunt, memoria, quæ apud peritos
quos-



quosque & gratos erit sempiterna. In tanta igitur meritorum Tuorum, erga Patriam, erga Academiam, & optima studia, abundantia, per plurimos honoris gradus ad Ministerii Ducalis primum & summum delatus, non ægrè feres, si in Natalium Tuorum dignitatem cliens Tuus inquirat, & omnibus ostendat, præter ea, quæ Principibus, quæque meritis Tuis debes, aliud quoque venerabile te habere, Natales scilicet, à plusquam sexcentis annis illustres, eaque familiâ ortum, quæ dignitate, virtute, fortitudine, prudentia, pacis bellique gloria eminuit, nec minus per fæminas illustrissimis aliquando, illustribus & nobilissimis affinitatibus floruit. Simul vero id quoque pateat legentibus, quamvis in tanto numero, tot seculorum decursu, extiterint in Familia Vesta eximia decora & ornamenta, tamen Te eminentissimis quibusque palmam non tam dubiam facere, quam præcipere, ut, in nobili gente nobilissimus, plus illi splendoris adjecisse, quam abea accepisse videaris.

Verum, ut ad historiam ipsam accedam, Castellorum in Hartzicis montibus extructorum ante tempora Henricorum Cæsarum mentionem multam fieri, non invenio. Ex quo autem Henricus III. & Henricus IV. Goslariam diligere, ibique saepius commorari cæperunt, plura eorum & potiora construi cæpta, verosimile est, quamvis exactam primæ illorum originis memoriam non habeamus. *Lambertus Schafnaburgensis*, Henrico IV. Imp. coævus, & rerum illius temporis diligentissimus & judicissimus scriptor, enumerat Castella ab Henrico IV. post mortem Patris extructa, *Hartespurg*, *Wigantenstein*, *Moseberg*, *Sassenstein*, *Spatenberg*, *Heimenburg*, *Asenberg*, *Vokenroth*. Dubites tamen, an illa tum primum extructa, an verò tantum restituta & amplificata. Solent enim Scriptores isti in determinandis originibus urbium castellorumque

rumque id saepe confundere, & amplificatores pro ipsis conditoribus agnoscere. Vokenroth jam ante Palatini Comitis fuisse, eiique ab Henrico quadam legum violentia ereptum, imposito praesidio, ipse *Lambertus* narrat. Et de *Hartzburgo* non minus dubitate licet. Quamvis enim natales ejusdem in tempora Christi nativitatem antecedentia collocare cum quibusdam nolim, neque ea, quae de Carolo M. destructore hujus loci, & de astri Crodonis in eo, ut postea non *Saturniburgum*, sed *Hartzburgum* vocatum fuerit, idoneis auctoribus probentur: *Tidericus* tamen *Lange in Saxonia sua* à Conrado Cæfare (circa initia scilicet seculi X.) constructum *Hartesburg* memorat, & ibidem quoque Ecclesiam Christo & Valerio ab eo dicatam. Fortassis igitur de reædificatione & munitione tantum sunt intelligenda, quæ de condito *Hartzburgo* per Henricum IV. memorant modo laudatus *Lambertus Schafnaburgensis* & *Marianus Scotus ad An. 1075.*

De *Heimburgo* nihil ante Henrici IV. tempora innotuit, nullâ ejus in Annalibus mentione. Tum vero in bello ejus Saxonico, excidio suo, vel primo loco, inclarescere cœpit. Extraherat Henricus per omnes montes & colliculos in Saxonia Castella, & ipsi primò Saxones omni ope illum adjuvabant; Castellanis tamen deinde hostili more in vicina loca prædas agentibus, & nihil non insolentiæ committentibus, in suam perniciem, libertatisque extirpationem extructa illa esse, sero animadverterunt, suspicantes, nec forte sine causa, Imperatorem id agere, ut, deletis ad internacionem Saxonibus, Svevorum gentem, sibi carissimam, eorum loco in his terris constitueret. Cum igitur frustra Castellorum demolitionem petiissent, abeunte ex Saxonia Henrico, Principes ejus, fædere cum Thuringis facto, non de persecundo Cæfare, sed destruendis Castellis, solliciti, omnem in id operam suam converterunt.

runt. Quomodo singula destruēta, nōnullis vim vi masculine
opponentibus, pluribus nunc enarrare superfluum fuerit.
De *Heimburgo* tantum aliquid dicam. Disertè *Lambertus Schafnaburgensis* scribit, Castellum illud primum omnium
à Thuringis obsessum; paucos intra dies vi militari armis-
que oppugnatum & denique succensum esse. *Anonymus* tamen *Scriptor Belli Saxonici*, quem *Goldastus in Re-*
plicat. pro Imperio contra Gretferum edidit, quemque putat
esse Rupertum Goslariensem Præpositum, postea Baben-
bergensem Episcopum, qui rebus gestis interfuit: Is, in-
quam, aliter rem narrat, tria scilicet millia Saxonum Ca-
stellum illud *Heimenburg* (quod *Hennenberg* vitio descri-
ptoris ibi male vocatur) omni vi oppugnasse, sed à Castel-
lanis propulsa esse, magna clade accepta. Deinde Comi-
tem Palatinum Saxonie cum sex millibus obsudione cinxis-
se castellum, certa spe, fore, ut fame ad deditonem obsessos
compelleret, sed tandem, corruptis auro Præfectis, arcis de-
ditionem impetrasse. Quicquid autem de hac variatione sit,
certum interim est, Castrum illud tum temporis à Saxonie-
bus fuisse occupatum & destruētum. Cum tamen dein-
de infelici prælio ad fluvium Unstrut Saxones à Rege de-
victi & fugati essent, moxque, illo in Saxoniam regresso,
Principes se dedidissent, omnia illa Castella, prius diruta,
summo nisu, summoque Provincialium labore & ærumna
restaurari Henricus jussit, & plurima nova insuper, in
omnibus per Saxoniā montibus & collibus, qui modo
ad arcendam vim paululum commoditatis habere vide-
rentur, extruxit, & reliquis quoque, quæ, deditis Princi-
pibus, in jus suum cesserant, præsidia militaria imposuit.
Inter hæc igitur *Heimburgum* quoque restauratum fuisse
ex ruinis suis, valde verosimile est, cum ob situs commo-
ditatem ad coercendos aut infestandos Halberstadenses
valde opportunum sit. Evenit tamen, ut iterum Saxonie-

B

Principes,

Principes, occasione per Geronis Comitis filios duos data, redintegrato contra Henricum bello, armata manu Saxoniam omnem peragrarent, notatque diligentissimus *Lambertus Schafnaburg.* eos, *Castella*, quibus Rex præsidium imposuerat, alia ditione, alia militari manu, omnia recepisse. Et ita deinde, Henrico à Pontifice Romano excommunicato, Principes in ejiciendis ubique Regiis præsidiis continuarunt. Cumque mox prælia felicia à parte Principum intervenirent, probabile est, in manibus Principum Castella ea mansisse: certè dirutorum iterum nulla extat in Annalibus mentio. Deinde vero Henrico Leoni paruit. Nam in bello inter Fridericum I. Cæsarem & Henricum Leonem gesto mentio fit, illudque cum aliis Cæsari traditum ad ann. 1180. refert *Chronicon Bigaugiense*: quod idem refert *Chronicon Montis-Sereni*, in quo iterum male scriptum est *Henneberg pro Heimenberg*, inferendumque etiam hujus Castrinomen *Arnoldo Lubecensi lib. 2. cap. 31.* cum in MSto Coice Ranzoviano ita haberi annotet *Cl. Bangertus*. Quid ex eo tempore castello huic factum sit, non accuratè satis ab Annalistis annotatum est: nisi quod superiori seculo, circa Reformationis initia, exorto pertulantes Rusticos gravissimo bello, cædibusque & rapinis passim & in hac quoque vicinia excitatis, extremam castelli hujus desolationi manum impositam esse, avorum memoria constet. Hodie enim de antiqua Arce ruderæ tantum quædam ingentium murorum & fortissimarum turrium supersunt in vertice montis seu collis, non in amæni, ab aliis quasi separati. At Familiæ ab *Heimbburg* nomen celebre interim mansit in vetustis illius ævi monumentis: quod ab Arce illa accepisse, nullum apud me dubium est, quamvis primus, qui nomen inde retulerit, incertus sit. Annales illorum temporum memorant, *Henricum IV. per montes illos & colles in castellis Amicos suos*

suos collocasse, ut Saxones observarent, & Principibus
Saxonum captis, abductisque, beneficia eorum militibus suis,
quorum præcipue opera in bello Saxonico usus fuerat, distri-
buisse, ut habent verba *Lamberti Schafnaburgensis*. Hinc igitur
à Castellis nomina sua non pauci Comites Barones-
que acceperunt. Ita *Comites de Hartzburg* passim me-
morantur, ut *Ludolphus de Hartzburg* sub Friderico I.
apud *Arnoldum Lubecensem l. II. c. 31.* & *Hermannus Comes*
de Hartzburg apud Eundem *l. 6. c. 5.* & *Hermannus &*
Henricus Comites in Diplomate Ottonis apud *Maderum in*
Antiq. Brunsv. p. 131. & in litteris *Philippi Regis de ann.*
1186. apud *Herm. Hamelmannum in Chronic. Oldenburg.*
Henricus Comes de Hartzburg adducitur. Ita ab alio Ca-
stello *Afenberg* nomen accepit, qui in litteris Vulradi Epi-
scopi Halberstadensis ann. 1268. testis adducitur, *Burchar-*
dus ab Afenberg. Sic igitur quoque Heimburgii ab arce
illa, quam Imperatoris Henrici IV. beneficio tenuerunt,
nomen mutuati videntur, quamvis intervenientibus
temporum difficultatibus illius possessionem amiserint.
Diu tamen illos post *Henricum IV.* adhuc castrum illud
tenuisse certum est. Vixit Friderici II. tempore quidam
Tidericus Lange, Canonicus Goslariensis & Eimbeccensis,
scripsitque præter alia de *Laudibus Saxonie Poëma*, quod
penes me MStum est, ex illo autem editum ante triginta
annos à Parente meo Joh. Henrico Meibomio. Ille vario-
rum Comitum & Baronum, qui in Saxonia tum fuerint,
arcesque & castella tenuerint, facit mentionem, ideoque
ex eo versus aliquot integros, rudes licet & incultos, quo-
niam adeos deinde etiam provocandum, adducam, cum
rerum hujus viciniae peritus fuerit, & idoneus proinde
testis.

*Barones, Comites, tenet & Saxonia dites,
Nobilitas illos ornat, magnosq; pusillos.
Everstein, Dasle, Hardenberg, addito Plesse,
Waldenberg, HEIMBORG, Wernigrod, postq; sit
Humborg*

*Sladen, Barbuje, post hæc Hademersleve, Hoje,
Wantslēve, Schartfelde, Blanckenborg & Querevor-
Mansvelt, Valkenstein, Warbergesive Regenstein.(de,
Lindaw, Schawanborg, Danneberg, Schermbeke, Wun-
storp.*

*Hi Principantur, multis castris dominantur,
Montibus & sita servant sua castra polita.*

Fortes armigeri, corpore belligeri.

Hi varias fortis armant quandoq; cohortes.

At vero, quis primus ille fuerit, & unde advenerit, cui Henricus IV. *Heimburgum* in beneficium contulit, nomine inde ad integrum gentem propagato, non certo constat. Antiqua traditio est, in bello illo Saxonico, rogatu Archiepiscopi Bremensis, qui Cæsari favebat, *Annonem* quendam ex Frisia selectas copias (& nominat quidem differtè *Fresones* inter varias gentes in exercitu Cæsarisi *Anonymus Auditor de Bello Saxonico.* à Goldasto editus p. 34.) Cæsari adduxisse auxiliares, & hunc esse primum in his regionibus gentiſ illius auctorem, quæ deinde à castro Heimburgo nomen na>a est. Hinc illa de ortu *Heimbburgorum Frisco* vetus persuasio. Vedit avus mens Henricus Meibomius apud D. Bacheim Canonicum S. Cyriaci Brunsvigæ Chronicon MStum Martini Poloni in membrana, cuius fini cum alia, tum hæc verba adscripta: *Illi qui Honstein & de Henneberg dicuntur, sunt Itali, Columnenses videlicet. De Lippia sunt Ursini, sicut & de Aneholt. Schomborg, Hoje & Heimborg venerunt ex Frisia. Qui quidem, quisquis fuerit, uti in prioribus secutus videtur* ocio-

ociosos illos & inepte curiosos , qui nobilium Familia-
rum Germanicarum origines ultra Alpes quærunt, (ceu in
Anhaltinis quoque facit Ernestus Brotuffius & in Lippien-
*sibus Bernhardus Willius in Chron. Lippiensi MSto,) & me-
rito explodendus: ita de Scomborgensibus & Hojensibus
non male sensit, cum originem eorum Frisicam esse nos-
tius fit , deque prioribus id jam tum observatum ab *Her-*
manno de Leerbeck in Chron. Schaumburg. de posterioribus
vero ab *Hilberto Schone & Gerardo Reinsbeck in Chro-*
nico Bremensi MSto. Ut ita fortassis alterum quoque illud
de *Heimburgiorum* origine Frisica verosimile esse videatur.
Fateor tamen , mihi semper illa suspecta visa esse & dubia,
cum nullo testimonio probatum sit, Annonem illum ex
Frisia venisse. Neque etiam argumentum illud, quod à
nomine *Annonis*, Genti *Heimburgicæ* dein admodum fa-
miliari , petitur, quasi idem sit cum nomine proprio, Fri-
siis usitatissimo , *Enno*, magni apud me momenti est. Cur
enim *Annonis* nomen, mutata etiam littera, ex Frisia pe-
timus, quod in tota Germania & Saxonia, cum aliàs, tum
illo ipso tempore, usitatum? Vel solus ille famosus Colo-
niensis Archiepiscopus *Anno* tempore Henrici IV. id do-
cuerit , ne de Wormatiensibus, Basileensibus, aliisque Epi-
scopis dicam. Scribitur autem modo cum, modo sine aspi-
ratione , ut alias *Hugo* , *Ugo* , *Haimo* , *Aimo* , & hinc Colo-
niensis Archiepiscopus à *Lamb.* *Schafnaburg.* ad an. 1056.
Anno, ab *Hermanno Contracto* vero *Hanno* vocatur, quam
in rem commentatur quoque *Martinus Opitus notis in*
Rythmum de S. Annone Colon. Archiep. p. 4. Suspiciatus
aliquando sum , originem *Heimburgicæ* Gentis Svevicam
esse. Jam tum enim memoravi, & ex Historicis notum
est, *Henricum IV.* Svevosuos in Saxoniam duxisse, iisque
arces & castella , ringentibus Saxonibus, credidisse & be-
neficia illorum ipsis contulisse. Fortassis igitur ex Svevia*

cum Cæsare venerint quoque primi conditores, sive deinde nomen hic mutaverint, sive etiam attulerint & hic retinuerint. Nam esse in Svevia castrum *Heimburg* & nobilem *Heimburgiorum* familiam (ex qua forte etiam *Gregorius Heimburgius*, Consiliarius Moguntinus, Pii II. Pontificis nobilis adversarius, quemipse Papa scientia juris & facundia inter Germanos facile Principem appellat) eamque hodieque ibi florere certum. Non improbabile proinde est, ad exemplum Svecicæ illius arcis Castello quoque Hartzico apud nos nomen id datum esse, non inusitato alias more, ut peregrina nomina nostris locis conferrent Cæsares, jam à Caroli M. ævo, qui Heristallo Saxonico ab Heristallo Gallico, ejusque filius Ludovicus Pius Corbejæ nostræ à Corbeja Gallica nomen dederunt. Jam tum tamen, qui castellum *Heimburgum* apud nos à Cæsare accepit, *Heimburgum* dictum, & ex Svevis illis nobilibus oriundum fuisse, non ausim certo asserere, cum præsertim *Heimburgorum* in superiori Germania Insignia cum Nostratium non conveniant. Sed lubet illi conjecturæ meæ aliam adjungere, non meam tamen, sed Cl. Viri Job. *Henrici Hofmanni*, immaturè nuper defuncti, qui magnam Historiæ Saxonicae peritiam sibi acquisiverat, cum Seren^{mis} Brunsv. & Luneb. Ducibus, Cellis primum, dein Hannoveræ ab Archivis esset. Devenerat is in illam sententiam, eandem esse Familiæ *Heimburgicæ* & *Hoimianæ* originem, à Ruedgero quodam Hersfeldensi, ab Haimone Episcopo Halberstadensi in has terras deducto, & quidem ex quadam annotatione *Rocchi*, *Monachi Ilsenburgensis*, *de vita Haymonis Episcopi Halberstadensis*. Fragmentum ipsum, uti illud ex libro grandi membraneo Ecclesiæ Hildesheimensis descriptis, & mecum communicavit, ita se habet: *Beatus Vir* (Haymo scilicet Episcopus) *ut operibus sanctis intentius in vigilare posset, omne seculi negotium à se removit, abjiciens.*

ciens illud in propinquum suum Ruodger, quem de Herosves-
feldensi Abbatia secum in Parochiam Albrestat adduxerat.
Hic commissum sibi opus industriose implevit, & propterea do-
mus sua sicut domus Obed, benedicta est à Domino, & valde
dilatans generationem suam filios filiorum ipse vidit, de quo-
rum sanguine adhuc in nostris diebus non paucos in Castro
Haimenborg gaudemus florescere. Testantur autem Chro-
nica Halberstadensia, *Winnigstadii*, *Torquati*, aliorumque,
Virum illum ab Haymone Episcopo ex Abbatia Hersfer-
densi allatum, & constitutum Majorem Domus Episcopa-
lis (quæ dignitas dein perpetua facta est, & nostra demum
memoria exspiravit) condidisse locum quendam, *Haim* di-
ctum, liberosque numerosa serie ab ipso descendentes ab
Haim dictos, familiâ hodieq; florente. Inde igitur conclu-
debat *Hofmannus*, cum non constet, *Hoimios* unquam te-
nuisse *Heimbungum*, *Rocchus* autem illud de Ruodgeri posteris
attestetur, utrosque *Heimbungios* & *Hoimios* ab illo Ruod-
gero Hersfeldensi, Haymonis propinquo, descendere, quo-
rum priores *Heimbungum* castrum, posteriores locum
Haim tenuerint. Et hoc probabilius sibi videri asserebat,
quod tesseræ gentilitiæ *Heimbungorum* & *Hoimorum* ferè co-
incident, Trabibustam in his, quam in illis extantibus, ga-
lea tantum non nihil differente, qualis discrepantia à vete-
rum in talibus libertate dependeat. Verum hæc, ut ut in-
geniosa, non tamen etiam sese approbare mihi possunt.
Nam, ut ut *Hoimii*, ex hoc *Rocchi* fragmento, nomen pri-
mi Auctoris familiæ suæ discere possint, cum Annales
Halberstadenses quidem rem ipsam narrant, nomen ta-
men *Rudgeri* ignorent, & non errasse *Rocchum*, ex eo fiat
verosimile, quod *Ruodgeri* nomen frequentissimum sit a-
pud *Hoimios*, & quasi gentilitium: tamen, quomodo *Heim-
burgii* inde deduci possint, non video. Non constat enim
de *Rocco* illo, quando vixerit, & videtur mihi valde proba-
bile,

bile, longè aliud ab illo indicari *Haimenburg*, quam castellum illud Hartzicum, quodtum nondum fortassis erat constructum, sed in pago *Hamburgum* aliquod seu castrum, à Ruodgero in Cognati sui Haimonis Episcopi memoriam constructum, quod adamneim Soleke non procul à fontibus salis fuisse, notant Annales Halberstadienses. Illud igitur *Haimenburgum* tenuerunt Haymonis Episcopi posteri, *Hoimii* dicti, non alterum Hartzicum. Et vero, uti in *Hoimiorum* familia frequens est *Ruodgeri* nomen, ita, me conscio, nunquam id inter Heimburgios occurrit: nec de duarum harum familiarum ex uno fonte defluxu ulla extat patria traditio, quæ deesse in re tam memorabili non temere solet.

Interim, quocunque antehac nomine fuerit, inventus deinde Anno modo dictus novum à castello *Heimburg*, illudque ad posteros propagavit. Fuit autem Cæsari Henrico ob merita & fidem gratissimus, inque castris ejus fortissimus miles, illique, intendantas in imperio turbas, & contra caput ipsum conjurationes, fidelis, vitamque produxit ad annum usque 1106, Imperatori ipsi fatalem. Ita tamen hīc deficiunt Annales, ut nec de rebus gestis, nec de conjugio liberisque ejus quicquam afferre possim. In bello Saxonico sub Henrico V. memoratur etiam *Anno ab Heimborg*. quem eundem esse ratio temporum vix admittit: fortassis igitur prioris filius fuerit, Cæsari & ipse multorum meritorum & fidei nomine imprimis carus. Exortæ tum iterum erant inter Henricum V. & Saxonie Principes contentiones gravissimæ, hiisque libertatis avidi, ut sub Patre ejus Henrico IV. cæperant, inter se conspiraverant, avitam libertatem & sua armis defensuri. Cæsar vero omnes illos conjurationis participes dignitate privavit, aliosque in eorum locum substituit, & feuda, quæ ab imperio habebat, ademit. Ex his erat Fridericus, Comes Palati-

Palatinus Sommerseburgius , Senior dictus, qui primus dignitatem Palatinam , Friderico ex Palatinis Saxoniae , Wettinensis familiæ, oriundo erectam sibi vindicavit. Quem acriter persecutus Cæsar, gravique custodia detentum, non nisi intercedentibus plurimis Principibus, & solutis quingentis marcis argenti, liberum dimisit, plurima vero feuda, quæ ab Imperio habebat, eidem ademit, & non pauca, imprimis quæ circa Schöningam, *Annoni Heimborgio* contulit, cuius etiam posteri per duo amplius secula illa tenuerunt. Annotatur autem, hunc Fridericum Comitem A. 1118. *Annonem ab Heimborg* ad duellum provocasse: nec ille recusavit, intervenientibus tamen Reinhardo Episcopo Halberstadensi, & Præposito ejus Guncelino, res composita est. Uxorem habuit nobilem *de Bimende*, Helmoldi filiam. An vero ex ea, & quos genuerit liberos, certo affirmare non possum. Cum tamen in litteris An. 1146. memorentur *Anno, Sigefridus & Henricus ab Heimborg*, fratres, hos Annonis modo dicti filios fuisse, non caret verisimilitudine. Ex quibus *Henricus*, religiosorum ordini S. Benedicti transcriptus, in Cænobio S. Johannis Baptistæ ante Magdeburgum habitum sacrum induit. Et hos fratres sororem habuisse *Heilwigin* constat, quæ nupsit *Wernero*, qui tamen quis fuerit, non additur. *Sigfridus* filium reliquit, etiam *Sigfridum* dictum, cuius utriusque, & patris & filii, mentio fit in litteris An. 1159. Uxores tamen eorum ignorantur.

Et haec tenus quidem, quæ adduxi, ex densissimis Antiquitatis tenebris eruta, lucem in plusculis adhuc desiderant, nemine istocævo ferè extante, qui Illustrium Virorum memoriam conservaret, aut genus annotaret, nisi forte in Monasteriis curiosiores nonnulli id agerent, quorum tamen diligentia intra eos potissimum, qui suo ordini adscripti, suique cætus pars facti, aut qui liberalitate sua cænobia

bia ditassent, terminabatur. Deinde tamen à *Sigfrido*, quem modo dixi, ad nostra usque tempora, certior, & continua, & exacta series totius illustris familiæ haberi potest. Præterquam enim, quod plura Diplomata, Litteræ, & Donationum tabulæ, ab his temporibus ad nos pervenerint integra, in quibus aut *Heimburiis* feuda conferuntur, aut illi aliis ea conferunt, donantque sua bona & vendunt, aut more ævi, tanquam testes, in Tabulis solennibus adducuntur; Annales quoque & Chronicorum Conditores pluscula de illis annotant. Ex quibus non sine cura hæc compilata primum, dein digesta sunt.

Et *Sigfridus* quidem ille *Junior* in Henrici Leonis, Ducis Saxonie & Bavariae, aula vixit, fitque ejus mentio in litteris An. 1176, ubi cum Eberhardo de Lapideo Monte (Steinberg) & Ecberto de Walmoden testis adducitur. Filios habuit *Henricum* & *Annonem*, ut patet ex aliis literis, datis A. 1199, ubi cum Patre *Sigfrido* testes adducuntur filii, *Henricus* & *Anno*, vocanturque milites. Videtur autem *Sigfridus* ad notabilem senii gradum pervenisse, cum per integras quadraginta annos passim in litteris memoretur: tempus tamen mortis ejus ad supradictum Annum 1199. & seculi duodecimi finem pertinere crediderim, nam paullo post in aliis litteris vocatur *piæ memoriæ Sigfridus*. Hi deinde duo fratres, *Henricus* & *Anno*, uxoribus ductis familiam propagarunt, liberis utriusque sexus susceptis, non pari tamen diuturnitate, nam in *Henrici* posteris ea mox extincta est. Ambo fratres adducuntur simul in litteris 1222, ubi, quæ ab Imperio habuerant, Molendinum Wechungen, & partem agri Himmelreichsfrodensis Monasterio Walckenredensi vendiderunt, quod notat *Henric. Ecstomius in Chronic. Walckenredensi. p. 86.* *Henricus* in patria sua sede *Heimborg* vixit, & in litteris An. 1215. quibus Otto, primus Dux Brunsvicensis, proprietatem suam in Santer.

Santersleben Templo Hierosolymitano confert, inter Ministeriales Ducis, tanquam testis, adducitur, & in Ejusdem Ottonis litteris, datis Ecclesiæ S. Blasii in Brunsvic. A. 1227. itidem inter testes nominatur. Uxorem habuit *Juttam de Gatersleven*, cuius fratres nominantur *Ludgerus* & *Bertramus de Gatersleve*, Equites, ex eâque genuit quinque liberos, tres filios, *Nicolaum*, *Lippoldum*, *Johannem*, duasque filias, *Cunigundem* & *Adelheidin*: & quidem *Nicolai* mentio fit in litteris Volradi Episcopi Halberstadiensis An. 1257, ubi inter Nobiles Laicos testis adducitur. *Lippoldus* cum fratre suo *Johanne* memoratur in litteris Ducis Ottonis, Pueri dicti, A. 1236. quod scilicet *bona sua in Osleven* & *Beierstet resignaverit in manus Ottonis Ducis*, & acceperint *bona in Bersle*. Omnes vero hi memorati, *Henricus* cum uxore sua *Jutta*, & filiis suis, *Nicolao*, & *Lippoldo*, & filiabus *Cunigunde*, & *Adelheide*, adducuntur in litteris an. 1230, ubi consensum suum dant, ut Cœnobium Riddageshusani emere possit agros quosdam in Hadeber. Simon, Abbas Michelsteinensis, pararius fuit, & etiam sigillum suum litteris apposuit, quæ ita clauduntur. *Ada* hæc sunt in domo nostra Heimborg, præsentibus honestis viris, Dn. Annone de Heimborg, Johanne, filio ipsius, & *Henrico*, filio Lippoldi. Ubi tamen, quis ille *Henricus*, filius Lippoldi, sit, fateor me nescire, nisi ante dicti Lippoldi, qui filius *Henrici*, filius, & valde tunc adhuc juvenis fuerit, cuius tamen nulla alibi mentio. Vocatur vero ille *Lippoldus* Dapifer, uxoremque habuit de nobili familia de Balnehusen, cuius frater memoratur Echardus. *Lippoldus* quoque ab Heimborg, qui Monasterio Hujesburgensi dimidiā aream in villa Borsum, & quartam partem mansi cum omni utilitate vendidit, cuius itidem litteræ extant datæ Northusæ Kal. Mart. 1298, & aliæ A. 1306. datæ, apud Ecstoriū Chron: Walkenred. p. 110, & aliæ A. 1313. cum Quedlinbur-

linburgi esset, videtur esse hujus *Lippoldi Dapiferi* filius. Cum eo autem omnis memoria posterorum *Henrici* desinit: nam nec filiae *Cunegunda & Adelheidis*, an, & quibus nupserint, constat.

Ad *Annonem* igitur pergo, *Sigfridi Junioris* alterum filium, qui ad nostra usque tempora illustrem familiam propagavit. Magnum ille sibi virtute bellica paravit nomen apud plures Principes, Duces imprimis Brunsvicenses & Lynæburgenses. Mentio ejus fit in litteris Ducis Ottonis, Pueri dicti, datis in Brunsvic. A. 1232. Indict. v. in alio item privilegio illius Ducis Ottonis, dato an. 1247. Burgensibus in Duderstad, constituitur fidejussor una cum aliis. Et illius quidem Ducis Ottonis Dapifer fuit A. 1249, mansitque post mortem ipsius apud filium & successorem, Ducem Albertum. Habuit etiam aliquando Advocatiam Salinarum Schöningensium, quam tamen A. 1256. dimisit. Uxor ejus nomen ignoratur quidem, ex nobili tamen familia de Meinersheim (de qua multa habet Avus meus in *Chronico Riddageshus.* p. 51.) eam fuisse, Ludhardi sororem, constat. Et ex hac suscepit tres filios, *Henricum, Annonem & Heinonem*. De *Henrico* pluribus agam, quoniam virtutem, fortitudinem, & prudentiam suam in propaganda & defendenda Christiana religione occupatam habuit, quo militiae genere, si cætera recte se habeant, nullum apud Christianos majoris fieri par est, nullum acceptius Deo esse credimus. Hoc scilicet tempore, non in Oriente tantum pii fortisque Viri, institutis certis Militiæ Sacræ Ordinibus, loca sancta recuperare nitebantur, sed in occidente quoque contra paganos & Idololatras, qua voce qua ferro pugnabatur. Cum igitur Milites ordinis Teutonici, seu Hospitalis S. Mariæ Domus Teutonicorum Hierosolymitani, ex tota Syria cum reliquis Christianis expulsi, feliciter in Prussiam venissent, ibique à Conrado Masoviæ Duce.

Duce in Terram Culmensem vocati essent, per Ordinis sui
Duces, quos Magistros nominabant, summa cum laude &
gloria contra paganos militarunt, non terra Culmensi tan-
tum, sed tota pene Prussia subjugata. Isto vero exemplo
in vicinam Livoniam quoque, facto primum per Merca-
tores Lubecenses, in Dunæ fluvii ostium illapsos, Religio-
nis Christianæ initio, Episcopisque admissis, per illos Mili-
tes advocati, contra infideles se devoverunt, *professionis suæ*
signum in forma gladii, quo pro Deo certabant, in suis vestibus
preferentes (verba *Arnoldi Lubecensis Chron. Slavor. l. 3.*
c. 9.) dicti inde Gladiferi, item Gladio-cruciati, constituto
pariter ordinis Magistro, quorum primus *Vinno*, alter *Vol-*
quinus fuit. Excitati vero horum Ordinum fama & mi-
litiæ peculiaris gloria & sanctimonia, Imperatores & Pon-
tifices amplissimis privilegiis illos ornarunt; Principes ve-
ro, Illustres, Nobilesque viri, vel adductis Ordini in auxi-
lium copiis aliquamdiu cum Sacris illis militibus milita-
runt, vel ipsi etiam in Ordinis illius membra cooptari se
fecerunt, perpetuo militiæ talis voto. Et ordini quidem
Teutonicorum Militum in Prussia, cum alii Principes, ut
Henricus Marchio Misnensis, ejusque filius Theodoricus
auxilia multorum militum secum adduxerunt, tum, ex Se-
renissima quoque Ducum Nostrorum Domo, *Albertus*
Magnus An. 1265. ad eos militatum ivit, cuius *Petrus de*
Dusburg, Ordinis Theutonici sacerdos, in *Chronico Prusiaæ*
ante 350 amplius annos scripto, c. 25. & c. 26. magna cum
laude Ducis meminit, *Deo devotum Principem vocans,*
& cum multitudine copiosa peregrinorum in subsidium fratri-
bus in gravissimo necessitatis articulo constitutis venisse, castra-
que cepisse, & per spatium unius anni multa bella gesisse,
& toties vexasse Pruthenos, ut non potuerint respirare. Et
ad hujus patris sui exemplum filius *Albertus*, Pinguis-
dictus, cum Principibus aliquot, Alberto Landgrafio Thu-

ringiæ, & Ottone Marchione de Brandenburg & Dynastis
multis in Borussiam contra paganos cum signo crucis pro-
fectus est, ut notat *Monachus S. Ägidii in Compilat. Chronol.*
ad an. 1265. quamvis propter hyemem lenem eo tempore
nihileum profecisse, notetur in *Additam ad Lambert. Schaf-*
naburg. ad annum dictum. Hujus vero Alberti Pinguis filius,
Luderus, cum itidem ordini Sacro in Prussia militasset,
Magister dein Generalis Ordinis factus est, memineruntque
illius multa cum laude *Chronica Prussiaca*, & *Dusburgus*
quoque, extructamque ab ipso Cathedralem Ecclesiam in
urbe Regiomontana memorant, in qua etiam in muro Chor-
ri sepulcrum invenit, ut notat *Caspar Henneberg in Expli-*
cate. majoris mappæ Prussiacæ. p. 209. Similiter in Livoniam,
precibus Alberti Archiepiscopi Rigen sis, & Magistri ordi-
nis Volquini, iverunt militatum cum multis copiis Alber-
tus Dux Saxonie, Comes Orlemundanus, Arnstetensis,
aliique, de quorum rebus gestis pluribus differit in princi-
pio *Chronici sui Livonici Balthasar Russow.* Ad hos et-
iam sacros Milites Livonicos, ut jam ad nostram historiam
redeam, ivit *Henricus ab Heimborg*, virtutis & fortitudinis
suæ in illa optima palæstra illustre editurus specimen.
Quanta & qualia fuerint, quæ gessit, incuriosi quidem
Annalistæ ignorare nos patiuntur, magna tamen fuisse,
bonumque de eo Ordinis totius judicium, & magnam ex-
spectationem, inde colligere licet, quod in Magistrum
Teutonici Ordinis in Livonia A. 1245, fuerit electus. Teu-
tonici, inquam, Ordinis in Livonia. Cum enim Milites
Gladiferi incursionibus Barbarorum sustinendis pares non
essent, nec tutari etiam sua contra Danos, Revaliam pos-
sidentes, possent, in consortium ordinis Teutonici in Prus-
sia recipi petierunt, id quod etiam non diu post, cum Vol-
quinus Ordinis Magister periiisset, impetrarunt, facta Ordini-
num conjunctione, certis tamen pactis initis, quibus Li-
vonius

nicus Magister alteri illi Prussico aliquo modo subiectus est, accepto etiam, Pontificis jussu, Ordinis Domus Teutonicæ habitu regulari, Episcopis contra Prussiæ Rigenfem pro Metropolitano acceptantibus. Hinc igitur Hermannus de Salza Magister Generalis, seu summus, Ordinis Teutonici misit Hermannum Balke, (ita enim appellat *Dusburgus*, quem alii Falcke) Magistrum haec tenus Provincialem Prussiæ, in Livoniam, sed ille, cum per sexennum Ordini præfuisset, in Germaniam abiit. Tum summus Magister Ordinis in Prussia, *Henricum ab Heimborg*, Magistrum Ordinis in Livonia, A. 1245. constituit. Erant tum difficillima tempora, requirebatque Ordo talem Principem, qui non animo tantum valeret & prudentia, sed iis quoque corporis viribus, quæ expediendis gravis & continui belli negotiis pares essent. At vero in *Heimburgo* hoc nostro corpus erat imbecillum, & causarium, fractum sine dubio longis duro sub Marte laboribus, ideoque cum gravi illi muneri per biennium præfuisset, nec laudari à solis consiliis cuperet, Ordinisque fortunæ detrimen-
tum aliquod metueret, se se honore & auctoritate, quam dilectum fibi Ordinem commodis suis privare piè prudenterque voluit, utque aliud, affectu quidem & animo erga Ordinem, sibi parem, viribus vero corporis valentiorem sufficerent, obtestatus est, & impetravit, quod in *Chronico suo Livonico Balthasar Russowius* p. 8. notat, qui tamen non addit, an patriam repetierit, an ibi mortuus sit, ideoque & ego id, deficiente alibi quoque memotia, ignorare cogor. Numeratur *Henricus* inter Magistros Ordinis, à nonnullis II, ab aliis IV. Secundus, quia à Balkone, qui post unionem cum Prussiaco Ordine primus, alter est. Quartus, quoniam à primis Ordinis in Livonia initiis, post Vinnonem, Volquinum, Balkonem, quartus illi præfuit. Id certum, magnam tum fuisse dignitatem horum

Magistro-



Magistrorum, quam accipere illustri loco nati non recusarent: uti etiam tandem Magister Ordinis Livonici, postquam se à Prussico, numerata pecunia, redemisset, inter Principes Imperii locum habere cæpit.

Sed jam ad fratres *Henrici*, *Annonem* & *Heinonem* reverti cogor. *Anno*, Halberstadii in summo templo Canonicus fuit, & in litteris Volradi Episcopi, qui diu Ecclesiæ illi præfuit, sæpius adducitur Ann. 1257. 1258. 1266. 1293. ut ad longam senectutem ipse etiam pervenisse videri possit. *Haino*, tertius fratribus, qui in litteris Ottonis Ducis An. 1249. adducitur, solus familiam propagavit, omnium hodie viventium magnus parens: uxor tamen, quæ fuerit, & de qua familia, ignoratur: filii memorantur duo, *Anno* & *Henricus*, & una filia *Bia*. *Henricus* uxorem duxit, quamvis quæ illa fuerit, nesciam. In Cænobio S. Laurentii prope Schöningam Memoria, ut loquuntur, fuit ordinata pro *Henrico de Heimborg* & uxore, qui hic esse creditur, ibique sepultus: nam & bona circa Schöningam eum in divisione accepisse, certum est, cum frater *Anno* castellum *Heimburg* retineret, & alia bona. Vixit adhuc A. 1270., ut ex Tabulis patet, filiosque duos habuit *Annonem* & *Henricum*, in quibus tamen, sine liberis mortuis, linea illa desiit. Non possum hoc loco præterire, quod notat, solus licet, *Anonymous Auditor Chronicus Ducum Brunsv.* editus à *Madero in Antiquitat. Brunsv.* Verba ejus ita habent ad A. 1288. *In die Bonifacii Martyris Hinricus & Anneko de Henborch, Hildemarus Advocatus Irkesleve, de Salderen miles, cum XII. sociis in Hilmenstidde à communi vulgo miserabiliter occiduntur.* Vidi sæpius ipsum Codicem Manuscriptum hujus Chronicus (erat enim penes celeberrimum Conringium nostrum,) & non aliter quidem, quam *Henborch* scriptum vidi, legendum tamen esse *Heimborch*, & loqui Autorem de *Annone* & *Henrico*, *Henrici* filiis,

filiis, qui hoc tempore vixerunt, & de quibus nobis nunc sermo, nullum dubium est, cum tempus & nomina coincident, nulli vero alii nobiles *de Henborg* ullibi memorentur. Tumultusvero ille in hac urbe nostra Helmestadio, Annalibus quoque non incognitus, ortus est occasione litis inter fratres, Henricum Mirabilem ab una, & Albertum, Wilhelmumque ab altera parte, qui ultimi obfidence cinxerant urbem, à partibus scil. Henrici stantem. Et jam factæ erant induciæ, Legatiꝝ Ducum, Alberti & Wilhelmi urbem intraverant, quos, portis occlusis, cives impetu factu trucidarunt, cum multis aliis nobilibus, & ipso etiam Abbatे Werthinensi, Ottone Warbergio, si non fallit nos Catalogus Abbatum Werthinensium. Unde passim male audierunt Helmstadienses, & ab Imperatore proscripti sunt, ipso Henrico Miribili, cuius partes sequebantur, factum insolens & nullo colore excusandum, improbante. Incidit tumultus in An. 1288. De *Henrico* igitur ab *Heimborg* vera esse crediderim, quæ narrat *Chronici Auditor* quamvis solus, cum mortuus hoc tempore videatur, quippe quem anno sequenti inter defunctos referri deprehendi. *Anno enim ab Heimborg.* miles dictus, dum confirmat venditionem bonorum in Wobeke, citat *Henricum* fratrem & *Annonem* patrum, sed tanquam defunctos. Litteræ datæ sunt in Cœnobio Winhusen A. 1289. At *Annonem ab Heimborg*, *Henrici* fratrem, periisse in tumultu illo Helmestadiensi, quamvis forte illi interfuerit, falso um est, cum diu post adhuc memoretur. Uxorem habuit *Cunigundam Warbergicam*, Ludolfi & Hermanni, Canonici primum, dein Præpositi Hildesheimensis, sororem. Producam in hujus rei fidem ex ipsius *Ludolfi de Werberg* litteris, Monasterio Mariæmontano ante Helmestadium datis, verba huc facientia: *Nos, Ludolphus D. G. nobilis dictus de Werberg, omnibus hoc inspecturis scriptum salutem in Domino*

D

Sempiter-

sempiternam. Qua geruntur &c. quod nos *Ludolphus* nobilis
de *Werberge*, ex consensu fratris nostri *Dn. Hermanni*, Ma-
joris Ecclesiae in *Hildesheim* Canonici, & sororis nostrae *Cuni-
gundis*, uxoris honorabilis viri, *Dn. Annonis de Heimborg*,
generi (id est, sororii seu affinis, more loquendi tum usita-
to) nostri, vendidimus Ecclesiae Montis S. Mariæ &c. præ-
sentem paginam sigillo, nostro scilicet, & fratris *Dn. Her-
manni*, & quia soror nostra *Cunigundis* ipsa sigillo caret, ho-
norabilis viri sui *Dn. Annonis de Heimborg*, generi nostri,
sigillo sigillari fecimus &c. Acta sunt hæc Anno Domini 1303.
in Castro *Werberge*. Hi duo Conjuges vixerunt adhuc
An. 1306, citati in Litteris Marchionis Brandenburgici
Hermannii, illo anno datis. In litteris quoque, eodem
anno datis, *Henrici & Baldwini de Wenden* citatur *Anno.*
imò, vixisse eum sequenti adhuc anno docent superstites
tabulæ Alberti, Ducis Brunsvicensis, dicti *Pinguis*, qui in
Castro *Wulfenbutle* anno memorato XII. Kal. Junii *Domi-
no Annoni*, *Militi de Heimborg*, ejusq; veris hæredibus do-
nat omnem proprietatem, tam in villa *Höcherstorp*, quam in
agris &c. scribitq; hoc se facere intuitu multorum obsequio-
rum sibi fideliter ab illo præstitorum, ut forte in servitio Du-
cis illius eum fuisse, hinc colligere sit. Ex quibus omni-
bus patet, falsam esse Chronicæ illius relationem de cæde
Annonis ab Heimborg; fortassis autem *Autor Anonymus*,
qui in hac vicinia vixit, primum rumorem de cæde utrius-
que *Heimburgii* ad aures allapsum secutus est, annotavit
que statim ea, quæ dein falsa deprehensa sunt, ceu nihil
insolitum est, in præliis & tumultibus occisos memorari,
qui tantum vulnerati, diu dein adhuc superstites. Interim
hunc *Annonem ab Heimborg* etiam sine liberis mortuum
esse constat, solo ex illa familia *Annone*, *Hainonis filio*, qui
Heimburgum tenebat, cum posteris suis superstite. Ille
tamen etiam, ut mox narrabo, Patriæ suæ Arcis posseffio-
ne ex-

ne excidit, alibique sedes quæsivit: Et deinde per tristia totius Germaniæ, & turbulentia quoque Saxonie nostræ tempora, variasque rerum vicissitudines, Illustris familia ad angustias redacta est, animi tamen magnitudinem fortunæ iniurianti opposuit, & in ipsis adversis major, operam semper dedit, ne quicquam antiquo splendori decederet.

Monendum enim hic est, antequam ad posteriora illa tempora decurram, propter nonnullos Antiquitatis incuriosiores (cum alias ex omnibus iis, quæ hæc tenus adduxi, veteris ævi morum perito id jam tum sit manifestum) *Heimburgios* statim à prima in hac Saxonia origine sua, non in infima, sed primaria nobilitate locum suum habuisse, quales quidem hodie Baronum & Nobilium Dominorum nomine veniunt. Inter illos enim collocari observes, quando pro testibus in solennibus Tabulis adducuntur; inter *Nobiles*, inquam, alio à *Militibus*, *Ministerialibus*, *Famulisq; loco*, vocarique *Dominos de Heimborg*, peculiari honoris titulo. Debere enim hæc ex more veteris ævi, non nostro, dijudicari, quivis prudens facile intelligit. Qui hodie *Nobiles* vocantur, *Equites* alias, (die von der Ritterschafft) tum temporis non *Nobiles*, (Edle) sed *Erbare*/ vocabantur. *Nobilis* vero titulus dabatur Comitibus, aliisque ex primaria nobilitate. Illustrabo hæc verbis *Alberti Crantzii*, qui superioris seculi initio vixit, sed historiæ medii ævi, Saxonice imprimis, peritissimus fuit: *Qui olim, inquit l. 3. Metropol c. 11. Ministeriales di- di sunt, aut Feudatarii, nunc ambient dici Nobiles. Sed co- arguit illorum superbiam usus Principalium scribarum, & omnium reellè discernentium munera graduum singulorum. Primi enim Barones inter Nobiles deputantur, inde Liberi Domini, postea Comites, inde Duces, quos appellat Papa Nobiles Viros.* Adducit vero lib. 8. c. 46. etiam originem

D 2

eius



ejus moris: Sed ea appellatio ab assentatoribus ex superiori Germania ad nos descendit, modestiores tamen eam non recipiunt. Quæ ultima verba Crantzii valde verosimilia mihi fiunt, quando ealego, quæ de origine Nobilitatis in Chro-nico suo Helveticō notavit Joh. Stumpfius l. 4. c. 29. Quam-vis enim circa medium superioris seculi historiam suam scripsérunt, morem tamen illum, quo soli Comites & Baro-nes Nobiles dicti, ante trecentos annos in usu fuisse scribit. p. 291. Citius igitur, quam in inferiori Germania, ibi augeri tituli cæperunt. Nec tamen admittere possum, quod Lambecius Rer. Hamburg. l. 2. p. 194. in not. asserit, *Nobilis titulum, Regum duntaxat, & Ducum, & minimum Comitum fuisse*; quod enim Baronibus quoque, den. Freyen Herrn / ut nos hodie ab aliquot seculis loquimur, datus fu-erit, pluribus exemplis facillime ostendi potest, notatque recte Stumpfius, Comites, cum gradu maiores essent Baro-nibus, aliud titulum, Wolgeborne; & Principes illis ma-jores, celsiorem quoque titulum, Hochgeborne & Durch-leuchtige assumpsisse, ut ita penes Barones titulus *Nobilis* manserit, cum illi, qui post Barones, *Ministeriales* scili-cet & *Famuli*, non *Edele* / sed *Erbare* vocarentur. p. 290. b. Si quis hac de re adhuc dubitaret, posset ille convinci in-fitarum antiquarum tabularum subscriptionibus, in qui-bus testes ita collocantur, ut primo loco Sacri Ordinis ho-mines, deinde illi, qui ex primaria sunt nobilitate, Comi-tes, Barones, cum titulo *Nobilis*, denique alii ex inferiore sub nomine Militum (id est, Equitum Auratorum) *Ministe-rialium*, *Famulorum*. Ita in litteris Friderici, Episcopi Halberstadiensis, datis A. 1211. Indict. 14. citantur primo Canonici, deinde subjunguntur: *Laici vero nobiles Comes Hojerus de Valkenstein, Wernerus de Anvorde &c. Mi-nisteriales autem Gevehardus de Alvensleben, Dapifer no-bis. &c.* In quadam donatione Burchardi Archiepiscopi Magde-

Magdeburgensis citantur testes *Nobilis Vir Comes Henricus de Blankenborg, Milites*, *Johannes de Nendorp, Tilo Marscalcus noster*. &c. Diploma Magni, Ducis Brunsvicensis, datum An. 1357, ita clauditur: *Testes hujus rei sunt Gevehardus & Burchardus de Werberge, nobiles: Lippoldus & Vreden, & Baldeminus de Dalem, milites: Henricus de Veltheim & Burchardus de Asseburg, famuli*, Et hæc quidem liquida sunt iis, qui vel mediocrem aliquem gustum habent Historiæ Germanicæ & Saxonicae nostræ. Jam autem de *Heimburiis* clarum est, eos stylo superiorum seculorum inter *Nobiles* collocatos, ideoque ex primaria nobilitate fuisse. Adduxi supra versus nonnullos *Tiderici Langen*, Canonici Goslariensis & Eimbeccensis, qui seculo XIII. Friderici II. temporibus vixit, in quibus *Heimburgii* diserte *Comites* inter & *Barones Saxoniae*, quosque *nobilitas ornet*, collocantur. Possum vero id etiam ex Tabulis superstribus ejus ævi probare, in quibus testes advo- cantur, justo inter *Nobiles* loco. Ex litteris Volradi Episco- pi Halberstadiensis, An. 1257. Pontificat. 2. datis, pluscula huic facientia in rei fidem adducam: *Testes Hermannus Præpositus, Wiggerus Decanus, Burchardus Vicedominus, Volradus de Kerkberg, Rudolphus Portenarius, Everwinus Præpositus S. Bonifacii, Hermannus Scholasticus, Henricus de Regenstein, Henricus de Drondörp, Bartoldus de Clettenberg, Ludgerus Strutz, Anno de Heimborg, Ludolfus de Dalem, Hermannus Hude*. Laici vero, *Fridericus de Kerckberg, Volradus de Kranichfeld, frater noster, Wernerus de Scherembeke, Eberhardus de Suselitz, Nicolaus de Heimborg*, nobiles. *Ministeriales vero Henricus de Hor- dorp, Jacobus de Sivershusen, Cæsarus de Sarckstede &c.* In litteris Henrici & Baldewini de Wenden, datis An. 1306. in vigilia Apostolorum Simonis & Judæ, citatur *Anno, vir nobilis, dictus de Heimborg, miles*. Et idem *Anno in aliis*

aliis litteris A. 1290. vocatur *Dominus de Heimborg*. Cumque præterea toties *Heimburgii* cum aliis ex primaria nobilitate per conjugia sese miscuerint, inde quoque, eos non ex infima fuisse, probabiliter colligere licet. Sed redeundum est in viam.

Seculo vero decimo quarto Illustris illa familia non tantum Heimburgo arce pulsa est, sed etiam vicinia nostra abiit, feudaque eorum partim ad alios translata, partim ea, quæ circa Schöningam in Hotisleben & Hoierstorp habuerant, Baronibus Warbergicis, cognatis, vendita ab iis sunt, uti superstites litteræ testantur. Quo minus tamen omnia plenè narrare, & qua occasione id contigerit, possimus, defectus monumentorum facit, cogimurque hic quædam traditionibus credere. Id constat ex historia illius temporis, post Fridericum II. Cæsarem, privatam capite suo Germaniam, toto illo interregni, ad Rudolphum usque I. spatio, miris turbis fuisse agitatam, neminemque ab incursibus potentioris immunem, non vicinum à vicino tutum fuisse, sed omnia, citra leges, & superioris Magistratus auctoritatem, per tumultus & bellicam vim decisa. Qui igitur, jure licet optimo & hæreditario, arces, castra, & terras possidebant, si non propriis viribus, aut vicinorum fæderibus, frequentissimis tum temporis, tuti essent, inopinato pellebantur ab aliis, & exuebantur omnibus bonis, ne colore quidem aliquo recti quæsito. Sic igitur Annonem *Dominum in Heimborg* avita quoq; sede pulsum esse, illa ipsa fatali seculi calamitate, verosimile est, quamvis nescio quam monomachiam cum Comite aliquo Reinsteinio, in qua *Anno viator*, occiso adversario, evaserit, antiqua traditio ingerat, orta hinc exilii occasione. Id certum est, Annonem confugisse ad Ducem Lyneburgensem, Cellis sedem suam habentem, simulque ad *Dominos de Meinersheim*, ex quorum Nobili familia Avia ejus prognata.

prognata erat, concessisse, ibique tandem, spe de antiqua
fede repetenda praecisa, domicilium quæsivisse, ducta uxori-
re. Erat illa *Henrici de Hosingen* vel *Oesingen*, militis, fi-
lia unica, & multorum prædiorum isto in Ducatu Lyne-
burgico hæres, cuius avus *Henricus ab Oesingen*, miles,
Henrico Palatino, Saxoniæ Duci, Henrici Leonis Filio, à
consiliis fuit, adduciturque in litteris An. 1222. Soror ta-
men *Annonis ab Heimborg, Bia*, sive *Bina*, quam secundis
nuptiis duxit *Henricus Comes Reinsteinius*, cum marito
suo *Heimburgum* possedit. De *Bia* illa multa annotavit do-
ctissimus *Budæus in vita Alberti II. Episcopi Halbersta-*
densis & Ducis Brunsvicensis, quamvis nesciat, ex qua fa-
milia illa oriunda fuerit. Imprimis notat, eam, cum
duos filios Henrico Comiti peperisset, & duos quoque filias
Lucharden & Odam, A. 1289. Cœnobium Monialium S.
Nicolai in Halberstad fundasse, & post mortem mariti cum
filiabus suis id intrasse, inque eō vitæ suæ finem & se-
pulcrum tandem invenisse.

Verum, missa Comitissa *Bia*, & *Arce Heimburgo*, quæ
varium dein fatum habuit, ad *Annonem* in Ducatum Ly-
neburgicum revertendum est, qui Cellis plerumque vixit,
mortuusque est A. 1283. Turbat autem me hīc non parum,
quod *Henricus Ecstomius Chronic. Walkenred. p. 120.* me-
minit litterarum, in quibus *Anno ab Heimborg pro se &*
filiis, Ludolpho, Hansio & Annone, fatetur, se mansum
unum in Brockschowen, quem tenuerat in feudum à Comiti-
bus *Falkensteinis*, convertisse in religiosos *Walkenredenses*

A. 1306. Quis enim ille *Anno* sit, qui filios istis nomi-
nibus habuerit, An. 1306. fateor me nescire. *Anno* enim,
de quo modo egi, quique Arcem Heimburgum deserere
coactus est, jam mortuus erat illo tempore. Et habuit
quidem ille plures filios, sed aliis nominibus. Fit eorum
passim mentio in Tabulis antiquis, quarum unam inte-
gram

gram producam , ceu eam ex chartophylacio Monasterii
Marienthalensis Avus meus Henricus Meibomius eruit ,
cum inde familiæ *Heimburgicæ* non parum luminis afful-
geat, & quomodo illi, qui tum vixerunt , inter se cognati ,
pateat. *Henricus, Herwicus, Conradus, Anno, filii Domi-
ni Annonis de Heimborg universis præsentes litteras inspe-
ris in perpetuum.* Commendari solent litteris contradic-
timè celebrati, quatenus, si defecerit hominum memoria, fidelis
scriptura testimonium perhibeat veritati. Notum igitur sit
tam præsentibus, quam futuris, quod nos possidentes cum *An-
none, filio Dn. Henrici, Patrui nostri, proprietatem trium
mansorum, & quatuor arearum in magna Hamersleve, &
proprietatem trium mansorum & trium arearum in Wegersle-
ve de communi consensu vendidimus (Monasterio Marien-
thalensi sub Abate ejus Eberhardo) pro novem talentis
Brunsvicensium Denariorum liberam ab omni ad-vocatia &
onere servitiorum, liberè & cum omni jure, sicut eam Paren-
tes nostri possederunt, & nos possedimus perpetuo possidendam.
*Quorum mansorum Dn. Gerhardus de Berwinckel quatuor,
& Florinus de Watekessen & fratres sui cum areis eorundem
habuerunt titulo phoëdali.* Approbamus enim sic & ratam
habemus venditionem Patris nostri in prædictis duobus man-
sis Florini & fratribus ejus, quam fecit cum Monachis dicti
monasterii, à quibus etiam sustulit quatuor talenta Denario-
rum Brunsvicensium pro eisdem, quod fatemur literas per
præsentes. Testes hujus facti sunt *Wernerus de Schulenburg,
Theod. de Monte, Wernerus de Wedinge, Bertholdus de
Rede, Milites. Theodorus de Eschede, Ad-vocatus in Twife-
linge, Ludolphus de Werle, capellanus ibidem, Henricus de
Esbeke, Heideco de Jerxem, Wedechindus de Dobbenem,
Walterus de Nette & plures alii fide digni.* Ut autem hoc
factum in suo vigore permaneat, nunc & semper, nostro & Dn.
*Johannis, Militis de Eschede, sigillis ipsam fecimus communiri.**

Datum

Datum Zellis in octava Epiphanie. A. M CC XCII. Sigillo
autem Johannis de Eschede hæ litteræ fuerunt communi-
tæ, quia ille horum quatuor fratum tutor, datus ipsis ab
Ottone, Comite de Wolpa, à quo pleraque bona Oesingia-
na, de quibus supra dixi, feudali nexu tenebant. Ex his vero
fratribus *Henricus*, *Hartwicus* & *Conradus* deinde vix semel
memorantur amplius, sive juvenes mortui, sive in illa tem-
porum caligine ignota veluti sub nube sepulti. *Annonis* mentionem sæpius fieri invenio, qui testis nominatur in
tabulis Alberti Ducis Brunsvic. datis Wolfenbüttle. A. D.
1309. feria V. post Nativit. B. Mariæ Virginis & bona sua
circa Schöningam, hæreditate ad se à cognatis devoluta,
Hotislevæ, Wobecæ & alibi, quæ in feudo tenebat ab Al-
berto Duce Brunsvic. An. 1310. vendidit. Alibi vero in
Ducatu Calenbergico ante Diesterum alia sibi bona compa-
ravit. Uxorem habuit *Mathildam* ex familia de *Honlage*,
quæ inter equestres hujus Ducatus non postrema, superioris
seculi initio demum desiit, exposita pluribus ab *Avo meo in*
Chronic. Riddageshus. p. 95. cum qua adhuc A. 1321. vixit.
Albertus Dux Brunsvic. nominat eum in litteris An. 1318.
Strenuum militem, & fidelem suum, fitque ejus mentio adhuc
in litteris An. 1333. Ex hoc autem *Annonis* cum *Mathilda*
Honlagia conjugio nati sunt *Martinus* & *Anno*. *Martini*
mentio fit in litteris An. 1347. *Annonis* vero, Militis, in aliis
An. 1346. & 1352. Mortuus est An. 1355. aut paullo ante,
nam illo anno vocatur *piæ memorie*. Uxorem habuit ex
nobili familia de *Campen*, cumque illa quatuor filios, *Jo-
hannem*, *Heinonem*, *Annonem*, *Hartwicum*, & *Martinum*,
quorum omnium mentio fit in litteris An. 1362. 1368. 1372.
Vixerunt Adensbecci in Ducatu Lynæburgico, sed inde sede
translata, bonis prioribus divenditis, alia ante Diesterum
sibi comparaverunt. *Johannes* Canonicus fuit Mindensis,
& Archidiaconus Remensis, ejusque meminerunt litteræ

E

A. 1381.

A. 1381. *Heinonis* quoque, *Hartwici* & *Martini* mentio fit in litteris A. 1381. *Annoni* cum Senatu populoque Magdeburgensi graves fuerunt inimicitiae, ideoque, cum in Nundinis solemnibus Urbem intrasset, conscio Archiepiscopo, excitato tamen à plebe tumulto, inspectante licet & nolente Archiepiscopo, custodiæ à Senatu traditus est, nec ex eo tempore ulla ipsius mentio fit. *Martinus* vero ex his fratribus propagavit familiam. Et primo quidem ex Conjuge, nescio qua, duos filios habuit, *Volmarum*, Canonicum Mindensem, & *Annonem*, cuius mentio fit, A. 1398. & 1404. Superstes autem his filiis suis omnibus fuit *Martinus*, ideoque jam septuagenarius licet, ne improlis decederet, uxorem duxit *Gesam*, de gente *Stederiorum*, ex eâque unum filium suscepit, breveque, post illum in lucem editum, mortuus est. Filius ille, & hæres unicus, quod mortuo patre sex septimanarum infans esset, nomen inde naëtus est, & *Martinus*, cognomento *Puer*, dictus, in ipsa senectute ita appellatus fuit. Pervenit autem vivendo usq; ad A. 1482, ætatis suæ 74. & ex uxore sua *Ilsa Ruschenpolia* quatuor filias & quatuor filios suscepit, ex quibus *Martino*, *Henrico* & *Aschwino* Henricus Senior & Ericus, Duces Brunsvicenses, fratres, Decimam in Lune, Aream in Wunstorp, & fundos in Benniesien contulerunt.

In Hoc autem *Martino* desino, Excellentissime Domine. Quæ enim deinde in Gente Vestra acta sunt, quamque multis toga sagoque claris Viris floruerit, non necesse est, ut ex antiquis litteris tabulisque & semensis Chronicis eruantur, cum omnia, partim accuratè annotata in scriniis Vestris serventur, partim viventium adhuc memoria & publica fama constent. *Martinus* ille *Henricum*, hic *Heinonem*, ille *Martinum* iterum, hic *Justum Heinonem*, Tuum, Perillistris Domine Præses, & Senioris fratris Tui *Martini* Patrem produxit. Nunquam vero non deinde Illustris familia

milia Vestra, aut vividæ indolis & fortissimos milites, aut prudentiæ & sapientiæ capacissimos animos produxit, qui Principibus & terrarum Dominis ob virtutem, fidem, & industriam grati, magno apud ipsos in pretio essent. Evidem *Heimburgica* Familia bello & armis primam gloriam, & nobilitatis suæ originem, debet, non minus ac aliæ omnes illustres nobilesq; veteres familiae, istis scilicet seculis, quo litterarum secreta nobiles ignobilesque pariter ignorabant, omnium bonarum artium, præter militares, incuriosi: postquam tamen Dei benignitas sequentibus seculis alium habitum, alias mores, induxit, nec consilio minus, quam armis res geri cæperunt, Nobiles quoque familiae, litterarum & sapientiæ optima studia, necessariumque ingenii cultum amare & inter suos promovere cæperunt, *Heimburgicæg* tum gentis juvenes viri que in hoc multis aliis præluxerunt & exempla imitanda reliquerunt. Quorum nobis aliquot, non armorum tantum gloria claros, sed eruditio quoque insignes, & variarum linguarum peritis simos, disertissimo calamo exposuit, insigne quondam hujus Academiæ ornamentum, *Johannes Caselius*, in ea oratione funebri, quam *Wilhelmo ab Heimburg*, Patruo Vestro, in hoc Lyceo studiis, immortali cum laude nominis sui, operam præclarè danti, sed maximo cum luctu omnium denato, & seculi hujus anno primo hīc sepulto, scripsit. Scilicet Bella, & Aulæ veræ palestræ sunt, in quibus ingentium animorum, explorari vires & constantia possunt: nec dicam nunc, quantum in bellis quoque à studiis optimis, & Mathematicis imprimis Artibus, iubidii haberi possit, cum & veteri ævo bellicosissimæ nationes, & hodie Gallica, illius rei præstantia documenta exhibeant: ad Aulam tamen & majora Principum ministeria neminem esse aptum, nisi qui mature optimis studiis exultum animum, linguarumque & variarum rerum scientia decoratum sapientiæ

deinde civilis præceptis imbuerit, notissimum esse arbitror.
His igitur nominibus, semper aut in bello primi, aut in Au-
lis honoratori loco esse cupientes, litteras, doctrinam &
recta studia coluerunt *Heimburgii*, maximaque inde ad-
jumenta suis rebus gerendis habuerunt, magno ipsi in pre-
tio apud eruditos, imò pretium eruditis. Multi etiam eo-
rum amplissimis Sacerdotiis in Cathedralibus summis Ec-
clesiis maësti, mundi quidem à negotiis aliquantum, non à
patriæ tamen amore & commodis, ipsi à consiliis magnorum
Episcoporum, sese separarunt, Ecclesiæ, pauperum-
que patroni liberales, studiorumque optimorum hortato-
res, adjutores, promotoresque, id quod supra in *Afchmino*
& *Theodorico* ostendi, quos iterum vel favoris, quem Avo-
meo exhibuerunt, causa nomino, non instituto tantum vi-
tæ, dignitate, & virtute pares, sed litterarum quoque &
studiorum amore similes sibi. Neque vero illud in Gente
Vestra *Heimburgicâ*, laude utique dignum, prætereundum
est, quod sequioris quoque sexus curam habuerunt, &
non nisi nobilissimis, illustribus & illustrissimis familiis per
matrimonia sese junxerunt, &, uti filias suas non nisi proba-
tissimis à virtute elocarunt, ita ad sua connubia non nisi ge-
nero sum sanguinem admiserunt, ut ex supra allatis patescit.

Possem hæc omnia pluribus explicare, & mereren-
tur juvenibus gentis Vestrae ad exemplum inculcari, si ad
alium, quàm ad Te, Excellentissime Præses, Epistola hæc
directa esset: coram Te vero parcus id agere, imo tacere
decentius est, cum omnibus, qui à me produxi sunt, utut
splendidissimis, virtute & meritis Tuis caliginem induxe-
ris. Multum à Majoribus Tuis accepisti luminis, nec pa-
rum est, natum esse genere, quod ante sex integra secula,
raro in his regionibus exemplo, in primaria nobilitate fuit,
quodque in corruptum decus suum inter maximas tem-
porum vicissitudines servavit, & ad posteros transmisit.

Longè


Longè tamen majus est, omnium rectè sentientium iudicio, quod operum magnitudine & rerum maximarum usu omnibus majoribus tuis aut par aut major, novam lucem toti familiæ fænerasti, eamque virtutum exemplis semper fætam, novis, iisque eminentissimis, quotidie condoras. De Teigitur potius sermomihi instituendus foret, Tuarumque illustrium actionum merita viventibus in admirationem, posteris in exemplum essent exponenda: Et facerem, nisi mores tuos nossem. liberos, nudos, & rectos, & vix nostri seculi, animumque illum, adscititia simulationum adulacionumque respuentem, & in recti conscientia bonorumq; tacito applausu actionum suarum pretium statuentem. Quicunque tamen per hos viginti & amplius annos in his & vicinis terris vixerunt, illi mecum norunt quam difficilia tempora fuerint, quanti momenti negotia in Seren^{mæ} Domus Ducum Brunsvic. & Lynæb. curiis agitata, inter continua penè Regum Principumque bella, rebus nostris adnexa vel implicita, inter armorum lubrica, fæderum incerta, hostium, amicorum, socrorumque vicissitudines, ipsa etiam in pace pericula. Idem vero ignorare etiam non possunt, quanta, in illis angustiis, alacritatis, dexteritatis, prudentiae, & fidei experimenta deris, quotiesque Tuo ore ad Reges Principesque, non Domus tantum Serenissimæ utilitas, sed totius Saxoniæ libertas locuta fuerit. Cum in mari omnia tranquilla sunt, & venti posuerunt, quilibet etiam nauclerus regere navem, & nullo negotio deducere in portum potest: at, cum omnia sursum deorsumque vertuntur, nec minus à fluctibus infra, quam à cælo ventisque desuper periculum est, tum demum expertus Palinurus, multum terris jactatus & alto, requiritur optaturque. Par Reipublicæ cujuslibet fatum est. Quando in remotis vicinisque locis turbatur, & jam grandinosa nubes calamitatem certam.

in ductura Reipubl. adscendere supra verticem nostrum
videtur, quando hostes timentur, socii suspecti sunt, in-
sidiæ metuuntur undecunque, tum demum singulares il-
læ dotes & virtutes, quales tuæ sunt, Exellentissime Domi-
ne, requiruntur, Ingenium scilicet promptum & in nume-
rato semper, judicium acre, prudentia usu subiecta, indu-
stria incomparabilis. Si his se fere jungant, uti in Te se jun-
gunt, candor, & fides integra, & devotus patriæ animus,
& incorrupta mens, quid optare magis in primario Mi-
nistro Princeps, quid desiderare patria possit, non intelligo.
Gratulor Serenissimis Principibus nostris, gratulor Patriæ toti, quod in hæc
tempora inciderit virtus Tua, quando illa maximo usui fuit, & esse po-
test: DEV Mque Veneror, ut Te diutissime servet in columem, & illa in
formandis consiliis pro patriæ salute non die, non nocte, intermissa
contentio, nihil roboris corpori animoque subducat, sed novum sèm-
per vigorem addat. Idem benignus DEVS faxit, ut, dum Tu præcla-
rissimis virtutum exemplis familiam fæcundas, alii feliciter illam pro-
pagent, ut semper in ea reperiantur, qui virtute non minus, quam ge-
nere emineant, & ita hæreditaria semper quoque sit virtutis & erudi-
tionis in una domo laus. Quod quidem suo loco curabit frater Dn.
Martinus ab Heimborg, virtute, & animi altitudine, & singulari in pa-
triæ, cuius curæ & consiliis admotus, pietate, nulli secundus, dum in
Golterano suo, patria lede, feliciter natos filios in spem Reipublicæ, glori-
amque generis, ad virtutem, animique decentem per recta studia cultu-
ram educat, ex quibus cum duos ex familiari aliquot annorum con-
vici. Tu Justum Heinonem & Adolphum Ludovicum noverim, illorumque ala-
critatem, & promptitudinem ingenii, & amorem erga studia depre-
henderim, de reliquis paria mihi promittere audeo. Sed finio, Perillu-
stris Domine, &, ut hanc Epistolam, quæ fortassis tanta jucunditate ab
aliis quoque legetur, quanto labore & cura ex laceris, semelisque, &
non temere ob viis monumentis congesta est. Tu imprimis, Tuaque illu-
stris familia benebole accipere, & me meaque studia commendata sem-
per habere velitis, obnoxè rogo. Dabam Helmetiadii. in Acad. Julia.
Kalend. Januarii. A. C. 156 LXXXIII. quem felicissimum appreco.

Pars Familiae HEIMBURGIORUM, quorum in hac
Epistola mentio fit.

Anno
tempore Henrici IV.

Anno
sub Henrico V.



OKT m 2359

ANNA

10.10.1910 Hennig K.

ANNA

10.10.1910 Hennig K.

ANNA

